

Mai ita Salva Osan Povu / Estadu nian!!

Maluk Sidadaun Timorenses!

Parlaman Nasional (PN) foin dadauk ne'e halo lei ida kona-ba Pensaun Vitalisia (*uang pensiun seumur hidup*) nebe ho total 100% husi sira nian salariu agora, no sei aumenta bainhira vensimentu Parlamentu Ativu aumenta. Temi pensaun, maibe nia total nafatin hanesan vensimentu (*gaji normal*).

Alein-de ne'e, lei ne'e mos regula atu estadu TL tenki fo facilidade especial ba sira ho sira-nia familia, hanesan:

- osan atu halao tratamentu saude ka moras iha rai laran no rai liur
- exensaun ba taxa (*bebas pajak*) ba importa kareta ida hodi uza privada, no material hodi halo uma privada.
- Pasaporte diplomatiku ba sira no sira nia familia (fen/laen ho oan), no tratamentu especial ka VIP bainhira halao viajem iha rai laran no liur, ...etc

Esbosu ka draf lei ne'e iha semana liu-ba veto tiha husi Presidente da Republika. Maibe tuir lei katak, Presidente so bele veto dala ida deit, ne'e duni bainhira PN haruka fali dala-ida tan, Presidente hakarak ka lakohi tenki aprova.

Atu hamaus Presidente Republika nia-laran hodi aprova lei ne'e, PN halo no haruka-tan lei foun ida nebe regula pensaun no facilidade especial ba eis-titulares orgaun soberanu (ex-pejabat negara) hanesan Eis-Primeiru Ministru, Eis-Presidente Parlamentu Nasional no Eis-Presidente da Republika, no eis-ministru.

Iha esbosu lei foun ne'e, regula estadu tenki selu *ex-pejabat* (*negara* ka *menistru*) osan pensaun hanesan vensimentu agora, no facilidade especial hanesan:

- uma estadu ida, kareta estadu ida ho mina ba kareta, selu sekretariu privadu ida, selu asesor ka *adviser* ida, telefone 2, internet ida, no siguransa ka protesauun privada.
- exensaun ba taxa (*bebas pajak*) hodi importa kareta no sasan hodi halo uma privada ida (hamutuk uma rua ona).
- Pasaporte diplomatiku no tratamentu viajem VIP (*padahal* la-halao urusan *dinas*/estadu)
- Selu viajem ba estrangeiru (*luar negeri*) entre kontinental (*benua*), ho ema nain 2 nebe akompanha nia, dala-rua ba tinan ida...no seluk tan.

Maluk Sidadaun sira!

Ne'e abuza teb-tebes! Estadu tenki selu hodi ema sira ne'e goza ba interese privadu ka selu hodi sira servisu laos ba estadu.

Maluk Sidadaun sira!

PN halo lei ne'e hatudu momos katak sira la-iha sensibilidade ba situasaun krize no povu kiik sira nia moris susar. Sira PN so hanoin ba sira nia a'an ka estatutu (*status*) sira nia familia deit.

Hare deit ba! Membru PN sira perkupa deit ba sira nia moris bainhira sira laos ona membru PN, *padahal* sira ne'e barak mak emprezariu, dosenti, ka iha-hela kbiit atu bele hetan rendimentu ruma bainhira sira laos ona PN.

Hare deit ba! Membru PN sira la perkupa ho ema sira nebe iha kampu refugiadus, ka maubere-oan nebe to oras ne'e atu hetan osan dollar ida deit susar tamba sira la-hetan rendimentu ruma husi sira nia produhu, ka vitima sira nebe oras ne'e moris susar ka atu selu oan ba eskola deit la bele tamba sira nia aman TNI / milisia oho tiha, ...no seluk tan.

Tuir lolos, krize iha ita nia-rai agora ne'e bele loke membru PN nia matan, tilun no fuan ba halerik no susar nebe povu infrenta, hodi halo netik lei ruma atu proteje ka fo subsidiu ba produktu lokal, ka subsidiu ruma ba joven sira nebe la-hetan asesu ba benefisiu dezvoltimentu, ka subsidiu ruma ba vitima funu nain-nian hodi nune bele ha'kaman tiha sira nia moris susar, ka subsidiu ruma ba transporte hodi nune povu selu kareta la karu, ka subsidiu ruma ba Xefe Aldeia sira nebe servisu makas hodi organiza povu, no buat seluk-tan nebe importanti-liu ba hametin aliserse nasaun ne'e, no laos ba fali interese privadu ulun-boot sira.

Hanoin took! Se ulun mak boot liu ka todan demais, no ain nebe lori ulun ne'e kiik ka krekas hela, maka ulun ne'e sei la metin no nakdoko hela no aban-bainrua bele munu.

Maluk sira,

Se esbosu lei ne'e mak passa, ne'e perigu teb-tebes no sei lori konsekuensia boot mai ita nia estadu no povu, hanesan:

- Parlamen no governu sei la funsiona ona hanesan fatin hodi halo no implementa politika estadu, maibe sai fali fatin hodi hasae estatutu ema nia (sai elite). Ema tama PN ka Membru Konsellu Ministru ho motivasaun atu hakarak hasae nia no nia familia nian estatutu sai elite ka baino, nebe aban-bainrua la servisu maibe simu osan no tratamentu espesial nafatin.
- Halo todan orsamentu estadu deit. Katak, aumenta gastu estadu ba buat ida nebe la produtivu (la servi buat ruma ba interese ema barak ka estadu). Imajina took, se tinan hirak mai, ita nian estadu ida-be kiak ne'e, tenki gasta osan boot no aumenta ba beibeik hodi sustenta deit ex-membru parlamentu no ex-ministru ho nia familia (nebe agora ne'e sira simu vensimentu kuaze \$800 - \$1500), ita nian rai sei sai saida...?
- Halo todan povu deit. Katak bainhira governu la-ihha osan hodi selu pensaun ba sira, maka governu sei aumenta taxa (*pajak*) sasan folin, no povu mak tenki sustenta liu husi sosa sasan nebe karu. Tuir lei, osan husi reseita minarai labele uza ba selu despeza sira hanesan pensaun. Osan minarai so bele sustenta investmentu no servisu Edukasaun, Saude no Insfrastrutura.
- Halo luan (*gap*) liu-tan ema kiak no ema elite. Katak lei ne'e so atu ha'riku ema balu deit, no halo kiak ema barak (lei ne'e benefisia ema oituan-deit).

Maluk sira!

Pensaun, tuir lolos ne'e politika (*kebijakan*) sosial husi estadu ba ema sira nebe iha kondisaun disvantajen (*tidak beruntung*) ka la-produktivitu ona (la-ihha kbiit atu servisu hodi hetan rendimentu ruma). Agora ita hare took ba membru PN, maioria iha servisu dupla hanesan emprezariu, dosenti, no seluk tan. Sira iha liman, ain tomak nebe depois reforma husi PN sira sei bele servisu hodi hetan osan. Los duni katak, iha membru PN ida ka rua mak nia kondisaun tama ona iha kategoria desvantajen (tinan ferik/katuas), nebe kbiit atu servisu limitadu ona. Ba ema sira ne'e, ita hanoin estadu tenki fo atensaun ba sira nian moris, maibe laos ba membru PN hotu.

Lolos ne'e, biar pensaun ne'e produktu politika sosial estadu, maibe em-prinsipiu osan pensaun ne'e, ema simu husi nia osan rasik nebe duranti nia servisu, estadu kua hodi rai no funan iha Banku duranti periodu servisu. Ida ne'e la-akontese ba ita nian PN duranti ne'e! Oinsa ema ida servisu deit tinan 4 ka 5, depois nia hakarak simu pensaun ka subsidiu (= vensimentu, maibe la-servisu) duranti tinan 20 ba leten). Nia logika iha nebe?

Iha nasaun riku ruma, hanesan Amerika, Australia ka Portugal, iha duni subsidiu ka fasilidade espesial husi estadu fo ba sira nia eis-membru parlamentu. Maibe ne'e hanesan kompensasaun ba servisu makas nebe sira nia membru parlamentu no governu halo hodi lori dezvoltimentu ka rendimentu makas ba sira nia estadu. Dala-barak, membru parlamentu no governu sira ne'e

bainhira sei ativu, servisu to kalan no loron feriadu mos servisu nafatin. Maibe, oinsa ho ita nia membru PN ho governu? Duranti tinan hat, lei hira-ona mak sira halo hodi ba interese publiku ka ema barak. Duranti ne'e ita akompana husi media-massa katak PN seidak iha inisiativa ruma halo lei no duranti ne'e proposta lei mai husi governu deit, no duranti ne'e ema mos rona katak iha membru PN faltozu, no tuir fali ita nunka hare PN halo fiskalizasaun ba governu hodi kombate KKN ka prevene governu halo abuzu poder nebe hamosu krize agora dadauk ne'e. *Apakah* sira ne'e (eis-memburu PN) merese (*pantas*) simu pensaun no fasilitade espesial ba sira no sira nia familia..?

Maluk sidadaun sira!

Lei ne'e hatudu mai ita, katak ita nia politika-nain sira uza sala ona demokrasia. Demokrasia katak, povu mak nain ba soberania estadu ne'e (*kedaulatan rakyat*), no poder politika nebe ita impresta ba sira (PN) tenki halao hodi servi ba interese povu nian – laos ba grupu elite ida. Saida mak ita nian deputadu (*wakil rakyat*) halo ho lei ne'e mak, la-konsidera ka respeitu ona nain soberania estadu ne'e (povu), no **aktu ida ne'e ita bele konsidera hanesan Korupsaun Politika (halo lei hodi benefesia interese privadu)**. Ne'e hatudu mai ita katak, demokrasia ne'e ihaibun tutun deit ka hanesan maskra deit (*topeng*), no realidade deputadu sira praktika fali **Baino-krasia** (baino sira mak ukun)

Sidadaun Timorenses tomak!

Mai ita ejize ba ita nia deputadu PN atu respeitu no konsidera povu nia direitu soberania ba estadu ne'e, hodi halo lei ruma nebe servi ba interese povu laos fali ba sira nian interese privadu.

**Mai ita salva ita nia osan rasik (orsamentu estadu)!
Hodi Rejeita Lei Pensaun Vitalisia ba Eis-memburu PN no
Eis Titulares Orgaun Soberanu!**

Pamfletu ne'e publika husi:

Koligasaun ba Salvasaun Orsamentu Estadu / Pavo

(Lao-Hamutuk, HAK, DLO-NGO Forum, Etadep, Fokupers, Haburas, AMKV, AJTL, Rede-Feto, MDI, SCM-TL, CSCB, Hasatil, Renetil, Belun, Aliansi Tribunal Internasional, Fisipol-UNTIL)

Sekretariadu: Asosiasaun HAK, Farol, Dili